

TITAH
KEBAWAH DULI YANG MAHA MULIA PADUKA SERI BAGINDA
SULTAN HAJI HASSANAL BOLKIAH MU'IZZADDIN WADDAULAH IBNI
AL-MARHUM SULTAN HAJI OMAR 'ALI SAIFUDDIEN SA'ADUL KHAIRI
WADDIEN,
SULTAN DAN YANG DI-PERTUAN NEGARA BRUNEI DARUSSALAM

SEMPENA
UPACARA SOVEREIGN'S PARADE
PENGAMBILAN KE LAPAN BELAS
SEKOLAH PEGAWAI KADET,
AKADEMI PERTAHANAN
ANGKATAN BERSENJATA DIRAJA BRUNEI

PADA HARI KHAMIS
27 JAMADILAWAL 1441 / 23 JANUARI 2020

BERTEMPAT
PADANG KAWAD AKADEMI PERTAHANAN

Assalamu'alaikum Warahmatullahi Wabarakatuh
Bismillaahir Rahmaanir Raheem

Alhamdulillah Rabbil 'Alameen, Wabihiee Nasta'eenu 'Alaa Umuuriddunya Wadden, Wassalaatu' Wassalaamu 'Ala Asyarafil Mursaleen, Sayyidina Muhammaddin, Wa'alaal Aalihee Wasahbihee Ajma'een, Waba'du.

Dengan izin Allah Subhanahu Wata'ala jua, pada pagi yang permai ini dapatlah pula kita hadir untuk menyaksikan Sovereign's Parade bagi seramai tujuh puluh tiga (73) Pegawai Kadet Pengambilan Ke-Lapan Belas (18).

Syabas dan tahniah di atas kejayaan para Pegawai Kadet menamatkan latihan mereka selama dua belas (12) bulan dan juga di atas mutu perbarisan yang mereka tunjukkan pada pagi ini.

Beta gembira dengan peningkatan bilangan Pegawai Kadet yang ditauliahkan. Pada tahun lepas, seramai lima puluh tujuh (57) Pegawai telah ditauliahkan, berbanding pada tahun ini kita berjaya melahirkan tujuh puluh tiga (73) pegawai bertauliah baru. Namun ini belum dapat dapat dianggap mencukupi, malah Angkatan Bersenjata Diraja Brunei masih memerlukan lebih ramai lagi Pegawai Tentera yang berkaliber.

Semenjak satu dekad penubuhannya, Sekolah Pegawai Kadet, Akademi Pertahanan, Angkatan Bersenjata Diraja Brunei, telah berjaya melahirkan seramai lima ratus dua puluh tiga (523) Pegawai Tentera yang bertauliah. Majoriti dari mereka ini, ada yang telah memegang jawatan-

jawatan penting di dalam unit-unit Angkatan Bersenjata Diraja Brunei, disamping ada juga yang telah berkhidmat di Sekolah Pegawai Kadet sebagai Intake Commander.

Beta berharap, Angkatan Bersenjata Diraja Brunei akan terus melahirkan Pegawai-pegawai Tentera yang professional, berdisiplin dan bekualiti tinggi.

Pada masa yang sama juga, diharapkan Jabatanarah Keanggotaan selaku ownership kepada Struktur Perkembangan Kerjaya (SPK), akan bersama-sama dengan Akademi Pertahanan dan Institut Latihan Angkatan Bersenjata Diraja Brunei untuk berganding bahu secara holistik, dalam memantapkan lagi sistem pengambilan dan kaedah latihan bakal-bakal Pegawai Tentera.

Dalam usianya mencapai sepuluh (10) tahun, Akademi Pertahanan telah mengalami beberapa perkembangan signifikan, diantaranya Universiti Brunei Darussalam (UBD) telah turut terlibat selaku Academic Provider kepada Kursus Maktab Turus.

Bagi menghadapi persekitaran yang penuh kompleks dan cepat berubah, Beta melihat Angkatan Bersenjata Diraja Brunei turut bergiat proaktif untuk sama-sama mencapai Wawasan Negara 2035 dengan setiap Pegawai Tentera dalam Angkatan Bersenjata Diraja Brunei adalah dikehendaki untuk mempunyai Personal Mastery in Military Leadership, Command and Management, disamping perlu memiliki daya pemikiran dan kepimpinan.

Dalam usaha meningkatkan imej dan kredibiliti, Sekolah Pegawai Kadet perlu meneruskan Program-program Latihan Bersama, Lawatan dan Pertukaran Pegawai Kadet dengan Sekolah Pegawai Kadet di luar negara. Pengalaman yang diraih semasa latihan, lawatan dan pertukaran ini tentu saja mampu menjadi pemangkin kepada Pegawai Kadet untuk memantapkan lagi kualiti dan jati diri mereka sebagai Pegawai Tentera. Ianya juga berguna untuk meningkatkan lagi tahap profesionalisme dan kualiti seorang pegawai tentera, setaraf dengan piawaian pegawai tentera Angkatan Tentera negara-negara sahabat di rantau ini khususnya, di samping juga akan mengukuhkan lagi hubungan diplomasi pertahanan.

Akhirnya, kepada Pegawai-Pegawai Kadet yang menamatkan latihan mereka pada pagi ini, Beta sekali lagi mengucapkan tahniah dan syabas di atas kecekalan dan semangat gigih mereka menjalani kursus yang bermakna ini. Segala pengalaman dan pelajaran yang diraih semasa latihan, perlu sentiasa diamalkan dengan penuh semangat.

Kepada ibu bapa serta penjaga Pegawai-Pegawai Kadet, Beta juga tidak lupa mengucapkan tahniah dan penghargaan di atas dorongan dan sokongan mereka kepada anak-anak, yang berperanan selaku perwira-perwira bangsa yang gagah berani.

Ucapan setinggi-tinggi tahniah juga Beta tujukan kepada seluruh warga Akademi Pertahanan, khususnya kepada Komandan, Pegawai Pemerintah, Intake Commander, Colour Sergeant, semua Jurulatih dan staf Sekolah Pegawai Kadet, kerana dengan dedikasi dan penat lelah mereka dalam menjayakan latihan serta Upacara Sovereign's Parade pada pagi ini.

Dengan lafaz Bismillahir Rahmanir Rahim, selawat dan salam ke atas junjungan besar kita, Nabi Muhammad Shallallahu 'Alaihi Wasallam, maka Beta kurniakan tauliah sebagai Pegawai

Angkatan Bersenjata Diraja Brunei, kepada tujuh puluh tiga (73) Pegawai Kadet Pengambilan Ke-Lapan Belas (18).

Sekian, Wabillahit Taufeq Walhidayah, Wassalamu 'Alaikum Warahmatullahi Wabarakatuh.